

INUIT ATAQATIGIIT INATSISARTUNI



UPA26/112

6. maj 2026

Paarma Lund Kreutzmann

Kalaallit Nunaanni mittarfinnut nunanut tamalaanut atorneqartunut tamanut kalaallit erfalasuata qaqinneqartarnissaa qulakkeerneqassasoq pillugu peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Lars Poulsen, Siumut)

Inuit Ataqatigiit Erfalorsorput, inuiaat kalaallit qanorluunniit inissisimagaluarutta ataatsimoorfipput – kinaassusitsinnik, nunatut inuiattullu namminiussuseqarnitsinnik ersisitsisoq tulluusimaarutigaarput.

Siunnersuuteqartorlu Lars Poulsen, Siumut qutsavigaarput siunnersuutaanut isumaqatigalugulu nunatta isaariaani, mittarfinni qulakkeerneqartariaqartoq Erfalorsorput taakkunani amuneqartarnissaa. Inuiannummi tikeraanut nunatsinnut tikinnermi, kinaassusitta nunattullu ataatsimoorfeqarnitta takutinissaa, siunnersuuteqartutulli pingaartilluinnaratsigu.

Isumaqarpuguttaaq siunnersuutaasoq suli annertusineqarsinnaasoq. Tassami mittarfinniinnaangitsiq nunatsinnulli isaariaasuni tamani, soorlu umiarsualivinnittaaq aamma taamatut qulakkeerinntoqartariaqarnera isumaqarfigaarput.

Mittarfiit nunatsinni aamma umiarsualiviit nunatta tunngaviumik pigisarai. Taamaammat imminermini pissusissamisoortuuvoq Erfalorsorput taakkunani pingaartinneqarluni atorneqartassasoq.

Inuiattummi ingammik ukiuni makkunani nunatta tatineqartarlunilu soqutigineqaraluttuinnarnerani, takuarput Erfalorsorput qanoq inuiattut ataatsimooritsillunilu nukissaqalersitsisoq, politikikkut allatigullu pingaartitaniit tamanit pingaarnerusarluni. Tamattamiuna nunarput ataatsimoorfipput, assigiiingisitaaralurluta Erfalorsorput kinaassusitsinnik ersersitsisoq.

Inuit Ataqatigiit siunnersuuteqartoq qutsavigeqqipparput, siunnersuutaalu soqutiginartoq suli annerutinneqarsinnaasutut isumaqarfigalugu imaattumik allannguutissatut siunnersuuteqarluta:

Kalaallit Nunaanni isaavinni tamani, soorlu mittarfinni umiarsualivinnilu, nunanut tamalaanut atorneqartunut tamanut kalaallit erfalasuata qaqinneqartarnissaa qulakkeerneqassasoq pillugu Naalackersuisut peqquneqarnissaannik Inatsisartut aalajangiiffigisassaattut siunnersuut.